



Fasnacht 2011

S Küsse maint gèschtert mi Frau
isch jetzt besser und dr Sex dä klappi au
I ha mi nämmlig uff d Wärbig verloo
statt e Phäggli Camel, die neye Smokfree gno
Das Phäggli isch läär, das isch guet naime duure
bim Sex stingg i wenigstens nimm us dr Schnuure

Basel duet Kulturstadt syy
schoo bisch am Nil und nimm am Ryy
Statt Schiff kemme Floss dr Bach duruuf
und Sängler fiere d Aida uff
Kamel hetts leider kaini gää
als Ersatz hätt me kenne dr Morin nää

D Leuthard hett e tolli Ydee
statt Kanteen solls numme zweelf Regione gee
Unseri Regierig hett Frayd do an dämm Gfasel
die drayme vom e autifreie Basel
In dr Stadt wänns numme no Velo gsee
und d Auti parkiere in Basel-Oscht am Ziirisee

Neij Drämmli fir Basel die mien halt syy
au mir Basler Spatze gseen das yy
D Schlaufe nach Weil kenne mir au verstoo
so kennte d Schwoobe schnäller Heime goo
S Comitee kennts grad als neij Route nee
so kennte d Schwoobe dr Cortege dehaime gsee

Gescht Zoobe ha ych dr Megge droffe
als Pändler isch dä vo Ziiri nach Basel glooffe
E Zugbyyljee liegt bi däne Bryyse nimm dinn
Autifahre isch z dyyr und macht kai Sinn
Bi däne Bryyse sin mir die Dumme
drumm faahr ych jetzt nur no mit Rollschueh umme

Basel hett dr Ryy, s Tattoo, d Museumsnacht
e FcBee wo als Schwiizermaischter lacht
E ainzigartige Moorgestraich
au dr Vogel Gryff isch kai Saich
Dr Zooli kriegt sogar e Huus fir d Affe
jetzt mien die nimm ins Roothuus goo schaffe

Mit em Rauchverbot heschs als Baizer schwäär
die halbi Zyt stooht Di Bude läär
Als Bänggler ka ych das nit verstoo
dass d Raucher stündig mien uuse goo
Damit ych in Rueh mini Värs ka bringe
gang ych jetzt nur no in d Fumoir go singe

Kunnsch z Basel us em Bahnhof uuse
das Puff do usse isch zum gruuse
Waisch nit rächt wo sellsch do duure
vo iberall faahrt dr e Drämmli vor d Schnuure
Vo alle Site kemme s ganz beliebig
kenntsch maine sigsch an ere Iberlääbensiebig

Dr Stutz vo Mubarak, Ben Ali und Konsorte
dien mir uff unsre Bange horte
Zu jedem Fach im Banggtresor
schryybt d Nationalbangg glyy e Dieffkielkische vor
Drumm mach ich mir jetzt do e Gschängg
mit Aktie vo Zuger Dieffkielschrängg

Ych hätt no e Värs gha vom Berlusconi
aber ych kann en jetzt nimm singe goppeloni
Dä ha ych sogar ussändig gleehrt
dass isch jo das wo mi so steert
Ych saags Eych jetzt ganz unverhoole
dä hett mir geschtert dr Guttenberg gstoohle

Wotsch au by uns bänggler?
Schigg doch aifach e Brief in unser Boschtfach
VSG Postfach 4365 4002 Basel
Oder goosch uff , www.vsg-basel.ch
